

Tutu ña uvi ña ni ke'i San Pedro kua'an nda'a' ne ini xini Jesús xiin' ra

Ti'vi' ra cha'an' nia

1 ¹Yu'u nduu' Simón Pedro, te xika' nuu' nuu' Jesucristo, te ña jaan' ni tianu' yu'u sania'a' i ichi' a. Te ti'vi' i cha'an' ndo'ó, ne ni natiin iin ña va'a xava'a, ña ini na ndo' xini ndo' Jesús saa nii' ini ndu. Te ni natiin ndo' ña jaan' xa'a' a ña xachuun' ndaku Ndiosí e' Jesucristo, ña ni sakakú yoo'. ²Te i'in kivi' na sañu'u' na Ndiosí ndo'ó, te na taxi ya'a tu a ña maní' koó xiin' ndo' xa'a' a ña xini ndo' xa'a' a, xiin' ña xini ndo' xa'a' xto'o e' Jesús.

Nia'a' ndo' ña ni kana Ndiosí ndo'ó, te ni nakaxin tu a ndo'ó

³Xiin' ña ndiee' Ndiosí ni taxi a sakuu' ña kuní nuu' e' te kutiaku e, te kaka ndaku xna'a e' nuu' a xa'a' a ña ni taxi a kundani e' xa'a' Jesús, ña ni kana yoo' xiin' ña ndiee' mii' a xiin' chuun ka'nu' ña ni xaa a. ⁴Te xiin' ña jaan' ni taxi Ndiosí kuento a nuu' e', te kuento jaan' ndii, ndatun' va a, te ka'nu' va tu a. Sakan' te kii' ndi'i kiee ndo' nda'a' ña kini ña kuní iin' ndo', ña yoo iin yivi' yo'o' ndii, natiin ndo' ñu'u' nde'i ña yoo ndivi'.

⁵Xa'a' a jaan' na saa ndo' sakuu' ña nduxa', te süu' ini kuiti' ndo' kuní ndo' Jesús, süu' jaan' ndii saa tu ndo' ña nduxa' te kaka ndaku ndo', te süu' ña jaan' kuiti' saa ndo', süu' jaan' ndii saa tu ndo' ña nduxa' te kundani ka ndo' xa'a' Ndiosí. ⁶Te süu' ña jaan' kuiti' saa ndo', süu' jaan' ndii saa tu ndo' ña nduxa' te ndiko ni'i' xiin' mii' ndo', te süu' ña jaan' kuiti' saa ndo',

süü' jaan' ndii sanduxa' tu ndo' te kuie kuü ini ndo', te süü' ña jaan' kuiti' saa ndo', süü' jaan' ndii sanduxa' tu ndo' te saa ndo' ña kuní Ndiosí kuiti'. ⁷Te süü' ña jaan' kuiti' saa ndo', süü' jaan' ndii sanduxa' tu ndo' te kundani ta'an' ndo' ndee naa ta'an' mii' ndo' nduu' ne yivi', te süü' ña jaan' kuiti' saa ndo', süü' jaan' ndii saa tu ndo' ña nduxa' te kundani ta'an' ndo' xiin' iin kanii' nimá ndo'. ⁸Sakan' ña, naa' xaa' ndo' sakuu' ña jaan', te chitu' vi' a nimá ndo' ndii, sakuu' nu' a ndo'ó nuu' ña xiní ndo' xa'a' xto'o e' Jesucristo, te täxi' a kunduu' ndo' ne kuäsa' kuní, uun ne köo' xachi' ña va'a xaa' xa'a' Ndiosí. ⁹Te ne köo' ña jaan' ñu'u' nimá ndii, xito' xachi' ña ña xaa' ña, te nduu' ña ndee naa ne kui'e nuu' näka'an' ka ña ña xa ni sandoyo' Ndiosí kuachi' ña ni xaa ña xta'an'. ¹⁰Ñani ta'an' i, sakan' na kuu' saa ka ndo' sakuu' ña nduxa' te saa ndo' ña jaan', te koto va ndo' ña ni kana Ndiosí ndo'ó, sakan' ña suvi a ni nakaxin ndo'ó. Te naa' xaa' ndo' sakan' ndii, köo' kivi' kuxiioo ndo' nuu' a. ¹¹Te kij' xaa' ndo' ña jaan' ndii, nunia' ko'o' Ndiosí yi'e' nuu' ndo' te xka'ndia ndo' mii' xa'ndia chuun' Jesucristo ndee ndi'i' ni kivi', ña nduu' xto'o e', ña ni sakahú yoo'.

¹²Ña jaan' na kuu' sanaka'an' chito i ndo'ó xa'a' ña ni ka'an i jaan' tee' ndee xa xiní ndo' a, te xika' ni'i' ndo' xiin' ña ndixa jaan', ña kumi' ndo' vitin. ¹³Sakan' ña xiní i ña vitin ña kusaa' tiaku i xiin' ñu'u' nde'i' yo'o' ndii, kuní a sanaka'an' chito i ndo'ó xa'a' ña jaan'. ¹⁴Sakan' ña xiní i ndii, nä'a' ka te nakoo i ñu'u' nde'i' i naa ni ka'an xto'o e' Jesucristo xiin' i. ¹⁵Te xiin' ña ndiee' sanaka'an' tu i ndo'ó sakuu' ña yo'o' vitin te naka'an' ndo' a tee' ndee xa ni xi'i' i.

Ña ndaku ka'an Ndiosí xa'a' Jesucristo

¹⁶Kij' ni sakuni' ndu ndo'ó xa'a' ña ndiee' koo' chukuu' xto'o e' Jesucristo, xiin' xa'a' ña nandiko' a iin yivi' ndii, ni ka'an ndu xiin' kuento xini tuní nda'vi so'o. Süü' jaan' ndii ni ka'an ndu xa'a' ña ni xiní nduchi' nuu' ndu, ña ka'nu' va ña nduu' Jesús jaan'. ¹⁷Kuachi' ndii ni tiin ka'nu' ña'a' yuva' e' Ndiosí, te ni ndasayí'e' va tu ña'a' a. Te ndee ndivi', mii' ndu'u' ña ka'nu' koo' chukuu', ni xiní so'o ndu tachi' yu'u' a ña ka'an ndii: "Si'e i, ña ndani va i, nduu' ña ñaa'. Te va'a va kuni i xini ña'a' i", ni kachi' a.

¹⁸Te miji' ndu'u nduu' te ni xini so'o tachi' yu'u' ña ni kixin ndee ndivi' kii' ni ita ndu xiin' Jesús xini' iku' su'un.

¹⁹Te xiin' ña jaan' ni xini e' ni xinu ña ni ka'an te ni ka'an tiakú tu'un Ndiosí, sakan' na va'a xaa' ndo' naa' kandi'xa' ndo' a, sakan' ña kunduu a ndee naa ñu'u ña kotuun nuu' ndo' mii' iin yavi ndee kitu', te tuvi Jesús nimá ndo', ña nduu' ndee naa tiuun' chie, ti' keta' kuaxi kitú'. ²⁰Te ña ka'nu' ka nduu' a ña kundani' ndo' ña ndee iin tu'un ña yoso' nuu' tutu Ndiosí, ña ka'an tiakú jaan' ndii, ni kaku a xini' ndee iin te yivi'.

²¹Kuachi' ndii, kii' ni ka'an tiakú te yivi' tu'un Ndiosí ndii, ni kaku a xini' mii' ra, süu' jaan' ndii Espiritu Santo ni saka'an ña'a', te ni ka'an tiakú ra saa kuní Ndiosí.

Ka'an Pedro ña koto xiin' mii' e' nuu' te sania'a tun vixi
(Judas 4-13)

2 ¹Ndisu ni yoo tu te ka'an tiakú tu'un vixi tein ne ichi' yata' e', ne Israel. Te nii' sakan' koo tu te sania'a tun vixi tein ndo'ó. Te sania'a si'e ra ña xini xa'an' ña sativi' ne yivi', te xiin' ña jaan' ndii, ndee xa'a' xto'o e', ña ni sakakú ña'a', ndiee yu'u' ra. Te xa'a' ña jaan' ndii, ki'i' va kixin ña sandoñu'u' ña'a'. ²Kua'a' va ne nduu' kuenta Ndiosí kundikun xata' ña ka'an ña sania'a te jaan'. Te xa'a' a ña xaa' nia' ña jaan' ndii, kania'a ne yivi' xa'a' ichi' ña ndixa, ña ndikun e'. ³Te xa'a' a ña ndioo' ini va ra xa'a' xu'un' ndii, tava' ra xu'un' nda'a' ndo' xa'a' kuento nda'vi so'o, ña xini xa'an' jaan'. Xa'a' a jaan' na ndee xta'an' vi' xa ni chituni' Ndiosí ña sando'o' a ra, te xa yoo tu'va kivi' ña ndoñu'u' ra. ⁴Ndiosí ndii, ni yoo ka'nu' ini a xa'a' ángele, ña ni xaa kuachi, süu' jaan' ndii ni ko'ni ña'a' a tixin iin yavi kunu va, te ni ndasi i'nu ña'a' a mii' iin yavi ikan', te ni taxí ndiatu ña'a' a ndee xaa kivi' ña sana'má a sakuu' ne yivi'. ⁵Te sakan' tu ni yoo ka'nu' ini Ndiosí xa'a' ne ni xaa ña nia'a ni ndiee iin yivi' xta'an', kii' ni ti'vi' a savi', te ni xa'ni' ña'a' a, te ni sakakú a Noé kuiti', te ni ka'an ndoso' xa'a' ña sana'má ndaku Ndiosí, te ni sakakú tu a uxá ta'an ka ne yivi' xiin' ra. ⁶Te ni sanduxin tu a ne ni ndiee ñuu Sodoma xiin' ñuu Gomorra ndee ni nandu ñuu jaan' ndee yaa' nú'u kuiti', te xiin' ña jaan' nia'a a saa sando'o' a ne xaa' ña nia'a. ⁷Ndisu Lot ndii, ni sakakú ña'a' Ndiosí xa'a' a ña ni xachuun' ndaku ra nuu' a, te ni ndi'ni va nimá ra kii' xito' ra ña nia'a, ña xaa'

ne ñuu ra jaan'. ⁸Te ni xachuun' ndaku jaan' ndii, ni ndo'o kua'a' nimá ndaku ra i'in kivi' kua'an xa'a' ña nia'a ña ni xaa nia, ña ni xini ra xiin' ña ni xini so'o ra.

⁹Te xiin' sakuu' ña jaan' nia'á xto'o e' Ndiosí ña kumi' a ndiee', te sakakú a ne xaa' ña kuni a nuu' ña sando'o' ña'a'. Te kumi' tu a ndiee' te sando'o' a ne xachuun' ndaku jaan' kii' xaa kivi' ña sana'má a sakuu' ne yivi'. ¹⁰Ña jaan' na sando'o' xto'o e' sakuu' ne xaa' ña xe'na' jaan' xiin' ña ka'an ña ndioo' ini iin' mii' nia, te y'vi nia kania'a nia xa'a' a ña ndiee' a.

Te sania'á ña xini xa'an' jaan' ndii, tiaku yu'u' ra, te ñuñu' tu ra, te y'vi tu ra ña kania'a ra xa'a' ña kumi' ndiee', ña ndiee' ndivi'. ¹¹Ndisu ángele ndii, tee' ndee koo' chukuu' ka a, te kumi' ka tu a ña ndiee' te sakan' te xini xa'an' jaan' ndii, kündieni a kania'a a xa'a' ña kumi' ndiee' jaan' nuu' xto'o e' Ndiosí. ¹²Te jaan' ndii, kuu' ra ndee naa kiti', ña köo' ña xanini ri' te xika' ri' saa tuu mii' kuiti' ri', te tuví ri', te tiin te yivi' ri', te ka'ni' ra ri'. Te jaan' ndii, kania'a ra xa'a' ña kündani ra, sakan' na kuui' tivi' xachi' ra nuu' ña kini jaan', ¹³te kundoo' ra saa Ndiosí xa'a' a ña ni satívi' ra inga ne yivi'. Sakan' ña tuu ra ndii, va'a kuni ra ña xaa' ra ndee ka nuu' ña kini kuu' ra ndee iin ke'in'. Te kii' naka' ña'a' ndo', te xixi' ra mii' ndiee' sii' ndo' ndii, kua'an ka'an' nuu' e' kuu' ra xa'a' ña kini ña xaa' ra xiin' ña kuaa' loco ra. ¹⁴Te jaan' ndii, küvi xka'ndia sana' vi' iin ña'a' nuu' ra, sakan' ña xa ndikun ni, te kuni tiin ña'a' ra, te köo' kivi' xikuín ra ña xaa' ra kuachi. Te xamaña ra ne itia' ini nuu' ña kandixa' nia Cristo, te chuun va ra ña tava' ra ndee ka ña ndioo' ini ra xa'a' nda'a' ne yivi'. Sakan' na kuui' te xa yoo köo tundo'o' saa Ndiosí nduu' ra. ¹⁵Te jaan' ndii, ni nakoo ra ichi' ndaku, te ni ko'ni ra nuu' ichi' Balaam, si'e te nduu' Beor. Balaam jaan' ndii, ni xtani va ra saa ra ña nia'a, te kii'n ra xu'un' nda'a' ne yivi'. ¹⁶Ndisu ni kani kuento ña'a' iin mburru xiko' ña'a' xa'a' kuachi ra xiin' iin tachi' yu'u' ndee naa ka'an iin ne yivi', te ni saiin kuín ri' ña ni kuni te ka'an tiakú siki' jaan' saa ra, tee' ndee köo' tu'un ti' jaan'.

¹⁷Te sania'á ña xini xa'an' jaan' ndii, nduu' ra ndee naa tikoyo', mii' ni ndoko tikui, te nduu' tu ra ndee naa viko', ña xiko' ni'i' tachi' ndiee', te xa'a' te jaan' tu ni sakoo' tu'va Ndiosí mii' iin yavi ndiaa' xachi'. ¹⁸Kuachi ndii ka'an ñuñu' ra xa'a' mii' ra xiin' kuento ña kuasa' kuni, te xiin' ña ka'an

ñā xaa' rā sativi' rā ne sakan' xinu' nuu' ne xini' ñā ndixa' xa'a' Ndiosí. ¹⁹Taxi' rā kuento rā ñā sandoó ndiká rā ne yivi' jaan' nuu' tu'un ndei' Ndiosí, kii' ndee mii' rā tia'an ndoo ndiká nuu' ñā kini' ñā xaa' rā. Sakan' ñā yoo ka küvi viko ni'i' xiin' mii' mii' nuu' ndee ka ñā'a ndii, ñā jaan' xiko' ni'i' ñā'a'. ²⁰Naa' xa ni kaku yoo ka nda'a' ñā ndioo' ini' ñā nduu' kuenta iin yivi' xa'a' a ñā ni xini' nia tu'un xa'a' xto'o e' Jesucristo, ñā ni sakakú yoo' nuu' kuachi e', te tuku ni sanasuku' ñā'a' ñā kini' jaan', te kanando ñā'a' a ndii, sativi' ya'a ka ñā'a' a ichi' ñā uvi' te sakan' ñā nuu' kii' xini' nia ichi' Jesús. ²¹Sakan' na kuui' ndee chaa' ka na koo' kivi' ni xini' ne jaan' ichi' ñā ndaku jaan', te sakan' ñā nakoo nia a kii' xa ni xini' nia a, sakan' te kuxioo nia nuu' tu'un va'a su'un, ñā ni xini' so'o nia. ²²Ndisu ni xaa te jaan' sakan' te xinu' naa ka'an ne yivi' ndii: "Naya' ndii, nakaxi' ri' suxan yu'u' ri'", kachi nia. Te naa ka'an tu ne yivi' ndii: "Kii' xa ni sakuchi' e' kini' ndii, tuku ni xiko kava ri' nuu' ndei'", kachi nia.

**Ka'an Pedro xa'a' ñā xka'ndia kii' xa
kuyatin' nandiko' Jesús iin yivi'**

3 ¹Ñani ta'an' mani' i, tutu yo'o' nduu' ñā uvi' ñā ti'vi' i nda'a' ndo'. Te xiin' uvi' saa' a kuní i kondia yu'u' i ndo'o' te ndoto nuu' ini' ndo', te kanini va'a ndo', ²te naka'an' ndo' ñā ni ka'an te nduu' kuenta Ndiosí, te ni ka'an tiakú tu'un a xta'an'. Te kuní tu i ñā naka'an' ndo' tu'un ndei' ñā ni taxi xto'o e', ñā ni sakakú yoo' nuu' kuachi e', nuu' ndu'u, te ni tianu' a sania'a' ichi' a, te ni saya'a' ndu a nuu' ndo'. ³Ñā xi'na ka ñā kuní a kundani' ndo' ndii, ñā yo'o' nduu' a: kivi' so'o' ndi'i' ndii, kande'kuje te kundi'i' xiin' e', te kundikun rā ñā kini' ñā ka'an nimá mii' kuiti' rā, ⁴te ka'an ndii' rā ndii: "Ni nakoo xto'o ndo' kuento rā ñā nandiko' rā, te koo' rā xaá, te ndee kii' ni xi'i' te xii' yata' e' ndii, iin kachi kaa' iin yivi' ndee vitin ndee naa ñā nuu' kii' ni kua'a a", kachi rā. ⁵Ndisu te yivi' jaan' ndii, küni naka'an' mii' rā ñā ndee xta'an' iin yivi' ndii, xa'a' a ñā ni ka'an chuun' Ndiosí na ni kua'a ndivi' xiin' ñu'u' iin yivi', te küni naka'an' tu rā ñā tixin tikui ni keta ñu'u' jaan', te xiin' tikui jaan' ni kuva'a a. ⁶Te xiin' ñā ni ka'an chuun' ñā jaan' tu ni sandeka'nú a iin yivi' kii' sakan' xiin' tikui. ⁷Te xiin' tu'un ndei', ñā ni ka'an chuun' a jaan', tu yoo tu'va ndivi' xiin' ñu'u'

iin yivi' ña yoo vitin, te koko a. Sakan' na xiin' ñu'u jaan' koko ña jaan' kii' xaa' kivi' ña sana'má Ndiosí sakuu' ne yivi', te sandoñu'u' a ne xaa' ña kini.

⁸Ndisu ndo'ó, ne ñani ta'an' mani' i ndii, ka'án i xiin' ndo' ña nāndoso' ndo' ña iin kivi' nuu' xto'o e' ndii, nduu' a ndee naa iin mii' kuiya, te iin mii' kuiya ndii, nduu' a ndee naa iin kivi' kuiti' nuu' a. ⁹Sakan' na xto'o e' jaan' ndii, nā'a' ka te saxinú a kuento a, ña ni taxi a nuu' e' jaan', te süu' ni kuu kuachí a naa xanini sava ne yivi', süu' jaan' ndii ndiatu' a xa'a' a ña kuie ini a xa'a' e', te küní a ña kuvi ndee iin ne yivi' xa'a' kuachi nía. Süu' jaan' ndii kuní a ña nama sakuu' nía nimá nía xa'a' kuachi ña xaa' nía, te kandixa' ña'a' nía.

¹⁰Ndisu kivi' ña nandiko' xto'o e' ndii, iin xaa' ki'i' kuiti' a ndee naa iin te kui'na'. Te ndivi' mii' ndiee' ña tuún nuu' e' ndii, ndoñu'u' a saa iin ña ni'i iyo xava'a kii' sakan', te koko ndoo ña yi'é ndiee' ndivi', te ñu'u' iin yivi' xiin' sakuu' ña yoo nuu' a ndii, koko sakuu' a. ¹¹Te xa'a' a ña sakan' ndoñu'u' sakuu' ña jaan' ndii, kuní a ña ndiee' ka kaka ndoo ndo', te kaka va'a tu ndo', te saa ndo' ña kuní Ndiosí, ¹²ña ndiatu' ndo' xaa' kivi' ña sana'má a ne yivi', te saa ndo' ña nduxa', te xaa' ki'i' va kivi' jaan'. Kii' sakan' ndii, ndivi' mii' ndiee' ña tuún nuu' e' ndii, ndoñu'u' a saa ñu'u', te ndutia ndoo ña yi'é ndiee' ndivi' jaan' saa ña i'ni' ñu'u' jaan'. ¹³Ndisu yoo' ndii, ndiatu' e' ña kaša'a Ndiosí iin ndivi' xaa' xiin' iin ñu'u' iin yivi' xaa', saa ni taxi a kuento a nuu' e', mii' koq mii' ndi'i ña ndaqu.

¹⁴Sakan' na kuii', ñani ta'an' mani' i, vitin ña ndiatu' ndo' xaa' kivi' ña nandiko' xto'o e' jaan' ndii, saa ndo' sakuu' ña nduxa', te sätivi' ndo' nimá ndo', te köo' ndee iin xa'a' ña kuvi tijn kuachi Ndiosí ndo'ó. Te saa tu ndo' sakuu' ña nduxa', te koq ndo' ña mani' xiin' a. ¹⁵Te naka'an' ndo' ña, ña kuie kuu' ini xto'o e' xa'a' e' jaan' ndii, xa'a' ña kuni sakakú a yoo' na xaa' a sakan' xiin' e', saa nii' ni ke'i tu ñani mani' e' Pablo nuu' ndo' xiin' ña xini tuní ña ni taxi Ndiosí nda'a' ra. ¹⁶Te kuyatin' sakuu' tutu ña ni ke'i Pablo jaan' ndii, ka'án a xa'a' ña yo'o'. Te yoo sava ña ni ke'i ra jaan' ndii, vixi va ka'án a. Sakan' na kuii', ne küu' kaxi' xiin' ne itia' ini nuu' ichi' Ndiosí ndii, sänakuachi' ndaqu nía ña jaan'. Te sakan' tu xaa' nía xiin' inga xaan' mii' yoso' a nuu' tutu Ndiosí. Xa'a' a jaan' na sandoñu'u' xiin' mii' mii' nía.

¹⁷Ne ñani ta'an' maní' i, sakan' na kuii', ndo'ó ndii, xa'a' a ña xa xini' ndo' ña jaan' ndii, kaka ndito' ini va ndo' koto ka kundikun ndo' xata' ña xini xa'an' ña xaa' ne kini' kuu', te nakoo ndo' ña ita' ni'i ndo' nuu' ichi' Jesús. ¹⁸Ndee chaa' ka kua'nu naa kua'nu ka ndo' nuu' ña ndani va xto'o e' Jesucristo, ña ni sakakú yoo', ndo'ó, xiin' ña kua'nu ndo' nuu' ña xini' ndo' xa'a' a. Te ña jaan' na natiin sakuu' ña tiin' ka'nu' ña'a' e' ndee ndi'i' ni kivi'. Sakan' na kunduu a.